



A las adressatas ed als adressats
tenor la glista

Cuira, ils 12 d'avrigl 2021

Revisiun parziala da la Lescha davart ils dretgs politics (introducziun da la votaziun per corrispondenza senza custs da porto) – consultaziun

Stimadas dunnas e stimads signurs

La Regenza ha autorisà la Chanzlia chantunala dal Grischun da dar en consultaziun la revisiun parziala da la Lescha davart ils dretgs politics en il chantun Grischun (LDPC; DG 150.100).

En la sessiun d'october 2019 ha il deputà Roman Hug (PPS) inoltrà l'incumbensa concernent cuvertas da votaziun prefrancadas per il Grischun. Questa incumbensa pretenda che la Regenza adatteschia la LDPC en quel senn che las votantas ed ils votants dal chantun Grischun survegnian da l'autorità cumpetenta cuvertas prefrancadas per las votaziuns e per las elecziuns communalas, chantunalas e naziunalas e ch'ils custs da porto vegnian surpigliads dal maun public (chantun Grischun). En la sessiun da zercladur 2020 è l'incumbensa vegnida acceptada dal Cussegl grond cun 61 cunter 50 vuschs per mauns da la Regenza.

Tenor l'avis da las aderentas e dals aderents è la prefrancatura ina mesira per augmentar la participaziun politica ed uschia per rinforzar la democrazia directa. Tras la prefrancatura duai vegnir facilità a las persunas cun dretg da votar da sa participar a las votaziuns ed a las elecziuns. Actualmain han las votantas ed ils votants la pussaivladad da votar a l'urna, ad in post inditgà da la vischnanca ubain per corrispondenza (cun trametter ils documents per posta u cun metter quels en ina chascha da brevs da l'administraziun communal inditgada da la vischnanca). Per pudair votar per posta ston las votantas ed ils votants actualmain surpigliar da princip sezs ils custs. Paucas vischnancas surpiglian oz ils custs da porto.

Tras la revisiun parziala proponida duai vegnir stgaffida en la LDPC la basa giuridica, per ch'il chantun possa da nov surpigliar ils custs da la votaziun per corrispondenza per posta en Svizra. Per quest intent duai mintgamai vegnir stampà in code Datamatrix sin l'attest da votar sut l'adresa da la vischnanca. Sch'il cedel da votar u il cedel electoral vegn tramess enavos a la vischnanca, fa la Posta in scan dal code sin l'attest da votar. Al chantun vegn messa a quint automaticain ina francatura. Percunter na resultan nagins custs per il chantun, sch'i vegn votà sur in'otra via u sch'i na vegn insumma betg votà.

Sa referind a la pratica d'auters chantuns e resguardond las ulteriuras pussaivladads existentas gratuitas per votar surpiglia il chantun Grischun la francatura da 0.95 francs per ina spediziun da posta B. Quest pretsch da consegna cuntegna in supplement da 0.10 francs per il product "spedi-ziun commerciala da resposta".

Ils documents da consultaziun pudais Vus consultar sin la pagina d'internet dal chantun (www.gr.ch/RM/publicaziuns/Consultaziuns).


Gugent As envidain nus d'examinar ils documents e d'ans trametter Vossas remartgas fin ils **12 da fanadur 2021** per posta a la Chanzlia chantunala dal Grischun, Reichsgasse 35, 7001 Cuir, u per e-mail ad info@gr.ch.

Nus As engraziain gia ordavant zunt fitg per l'interess che Vus demussais envers quest project e per Vossa posiziun.

Salids amicabels

CHANZLIA CHANTUNALA DAL GRISCHUN

Il chancelier



lic. iur. Daniel Spadin

Glista da distribuziun:

- partidas politicas chantunalas
- vischnancas politicas
- regiuns
- departaments da l'administraziun chantunala
- Controlla da finanzas